

## Evening Dogri (NSD) News Bulletin

14-Feb.- 2026

### आकाशवाणी

#### खास-खास खबरां

- प्रधानमंत्री नरेन्द्र मोदी हो'रें असम च ब्रह्मपुत्तर नदी पर पर बनाए गेदे भास्कर वर्मा सेतु दा उदघाटन कीता- गोहाटी सनें मुल्खे दे 4 शैहरें च 225 ई-बस्सें दी सेवा शुरु कराई ते मोरन बाईपास पर ज्हाजें दी इमरजेंसी लैडिंग दी सुविधा दा बी उदघाटन कीता।
- केन्द्री खजाना मंत्री निर्मला सीतारमण म्यूनिक सुरक्षा सम्मेलन च हिस्सा लैने लेई जर्मनी पुज्जी गेइयां ना। सम्मेलन च कुलसंसारी आर्थिक ते रणनीतिक मुद्दें पर चर्चाएं च हिस्सा लैगंन।
- अमरीकी राष्ट्रपति डोनाल्ड ट्रम्प हो'रें दुनिया दे सब्भनें शा बडे ज्हाज ढोने दी छमता आहले समुन्द्री बेडे USS गोराल्ड आर फोर्ड गी कैरेबियन सागर थमां मध्यपूर्व च तैनात करने दी तस्दीक कीती ऐ।
- 16 फरवरी गी नमीं दिल्ली च शुरु होआ'रदे भारत –AI Impact शिखर सम्मेलन च 100 कोला मते प्रतिनिधि शामिल होने जा'रदे न- जिंदे च केई मुखें दे राष्ट्रपति- प्रधानमंत्री ते अंतराष्ट्रीय संगठनें दे अधिकारी शामिल ना।
- बंगलादेश च बी.एन.पी नमीं सरकार बनाने दियें तयारियें च लग्गी दी ऐ। प्रधानमंत्री नरेन्द्र मोदी हो'रें दौनें मुखें दे लोकें गितै रमानदारी- तरक्की ते खुशहाली दी कामना कीती ऐ।
- आई.सी.सी. टी-20 विश्व कप च अज्ज आयरलैंड नै ओमान गी 96 रन्ज कन्नै ते इंग्लैंड नै स्काटलैंड गी 5एं विकेटें कन्नै रहाया- दक्खन अफ्रीका ते न्यूजीलैंड बश्कार मकाबला जारी ऐ।

<><><><><><>

PM -Assam Tour

प्रधानमंत्री नरेन्द्र मोदी हो'रें अज्ज 3 ज्हार करोड़ रपे दी लागत कन्नै ब्रह्मपुतर नदी पर बनाए गेदे भास्कर वर्मा सेतु दा उदघाटन कीता- जेहड़ा गुवाहाटी ते उत्तरी गोवाहाटी गी आंपू च जोड़दा ऐ। पुल दा उदघाटन करने दे बाद मोदी हो'रें कन्नै दे लाचित घाट आए ते कामरुप जिले दे अमीनगांव च स्थित IIM गोवाहाटी दे आरजी परिसर ते उत्तर पूर्वी श्रेत्र दे राष्ट्रीय डाटा केन्द्र दा वर्चुअल ढंगै नै उदघाटन कीता। एहदे इलावा प्रधानमंत्री हो'रें भारत दे 4 शैहरें लेई ई-बस सेवा योजना तैहत 225 इलैक्ट्रिक बसें गी बी झंडी दस्सियै रवाना कीता। इंदे च गुवाहाटी लेई 100- नागपुर ते भावनगर लेई 50-50 ते चंडीगढ़ लेई 25 बस्सां शामिल ना। प्रधानमंत्री हो'रें गुवाहाटी च बी.जे.पी दे कार्जकर्ताएं दे बूथ सम्मेलन गी बी सम्बोधित कीता। भास्कर वर्मा पुल दे उदघाटन कोला पैहले अज्ज बडुलै प्रधानमंत्री हो'रें दिब्रूगढ़ जिले च राष्ट्रीय जरनैली सिड़क पर मोरन बाईपास पर त्यार कीती गेदी इमरजेंसी लैडिंग सुविधा दा बी उदघाटन कीता ते लडाकू ब्हाई ज्हाजें- ट्रांस्पोर्ट ज्हाजें ते हैलीकाप्टरें दा प्रदर्शन दिक्खेया। अपने इक दिनै दे दौरे दौरान बी.जे.पी. कार्जकर्ताएं गी सम्बोधित करदे होई प्रधानमंत्री नरेन्द्र मोदी हो'रें आखेया कांग्रेस नै पूर्वोत्तर राज्यें गी सदा नजर अंदाज कीता पर स्हाड़ी सरकार एहदे पूरे पराते विकास लेई जी जान कन्नै कम्म करा रदी ऐ। उ'नें गलाया जे स्हाड़े लेई पूर्वोत्तर राज्य अष्ट लक्ष्मी ऐ ते इस बरे दा बजट अष्टलक्ष्मी लेई BJP-NDA दे नजरिए गी होर मजबूती देने आहला ऐ।

<><><><><><>

Amit Shah -Puduchery

केन्द्री गृहमंत्री अमित शाह हो'रें आखेया जे सरकार सूचना प्रौद्योगिकी- डेटा सेंटर ते आर्टिफीशल इंटेलीजेंस जनेए उभरदे क्षेत्रें च पुदुचेरी दे नौजवानें लेई रोजगार दे मौके पैदा करने पर ध्यान केन्द्रित करा'करदी ऐ। कराइकल च इक जनसभा गी सम्बोधित करदे होई शाह हो'रें आखेया जे केन्द्र शासत प्रदेश दे मछेरें गी अंतराष्ट्रीय बपार सरबंधें दे जरिए कुल संसारी सतह पर बडु-बडु बजारें तगर पुज्ज प्रदान करने ते उन्दी मच्छियें दी पैदावार दा बेहतर भाह थ्होना जकीनी बनाने लेई सरकार बनकदियां गेंई पुट्टा'रदी ऐ ते एहदे लेई सब्भै मुमकिन हीलें कीते जा'रदे ना। उ'नें दस्सेया जे जोहो

समेत प्रमुख सॉफ्टवेयर कंपनियों पुद्दूचेरी च अपनना कम्म शुरु करी दिता ऐ। उ'नें आखेया जे इक लैपटॉप निर्माण इकाई बी उत्थे स्थापत कीती जाई चुकी दी ऐ ते बक्ख-बक्ख देशें दे उत्पादें दा निर्यात करने दी बी योजना सरकारै बनाई दी ऐ। शाह हो'रें आखेया जे केन्द्र शासत प्रदेश दियें बंद पेदियें कपडा मिलें गी परतियै शुरु करने लेई माली सहायता दिती गेई ऐ ते मेद ऐ जे इनें हीलें दी बदोलत अगले 5एं बरे च पुद्दुचेरी मुल्लै दा इक आदर्श विकसित प्रांत बनियै उभरगा।

<><><><><><>

### Sitharaman- Munich

केन्द्री खजाना ते कारपोरेट मंत्री निर्मला सीतारमण होर म्यूनिक सुरक्षा सम्मेलन च हिस्सा लैने लेई जर्मनी पुज्जी गेइयां ना। म्यूनिक ब्हाई अड्डे पर पुज्जने पर भारत दे महा वाणिज्यदूत शत्रुघन सिन्हा हो'रें उन्दा सुआगत कीता अपनी इक सोशल मीडिया पोस्ट च खजाना मंत्री हो'रें दस्सेया जे इस सम्मेलन च ओ कुलसंसारी आर्थिक ते रणनीतिक मुद्दें पर महत्वपूर्ण चर्चाएं च हिस्सा लैगंन। सम्मेलन दे बाहरें उन्दा बक्ख-बक्ख मुल्लें दे मंत्रियें ते प्रतिनिधियें कन्नै गल्लबात आहली मलाटियां लाने दा बी कार्यक्रम ऐ। दौरे दौरान सीतारमण हो'र दुनिया दे अब्बल नम्बर दे बहुपक्खी संगठनें दे प्रमुखें कन्नै आपसी हितें दे मुद्दें ते आर्थिक सहयोग मजबूत करने दे बारे च चर्चा करगंन।

<><><><><><>

### Piyush -Budget

उद्योग ते बपार मंत्री पीयूष गोयल हो'रें केन्द्रीय बजट 2026-27 गी 2047 तगर भारत गी इक विकसित मुल्ल बनाने गितै इक निग्गर बुनियाद करार दिंदे होई एहदी मती सराहना कीती ऐ। अज्ज मुम्बई च इक संवाददाता सम्मेलन गी सम्बोधित करदे होई गोयल हो'रें आखेया जे एह बजट मुल्लै दे आर्थिक विकास- बुनियादी ढांचे दे विस्तार ते सब्भनें नागरिकें लेई समावेशी विकास पर आधारित इक खाका ऐ- जेहदे मताबक अगडे बधदे होई भारत दे हर इक नागरिक दा सामा ते पूरा पराता विकास मुमकिन होई सकदा ऐ। उ'नें आखेया जे एहदा मकसद विनिर्माण गी बढ़ावा देना- निर्यात दा विस्तार करना ते रासपूंजी लाने दी इच्छेया रखने आहले दी सुविधा लेई साजगार माहौल त्यार

करना ऐ। गोयल होरें आखेया जे बुनियादी ढांचे दे विकास लेई 12 लक्ख 21 ज्हार करोड़ रपे बक्ख रक्खे गेदे न- जेहदा मकसद रसद लागत गी घट्ट करना ते अर्थबवस्था गी रफ्तार देना ऐ। मंत्री होरें आखेया जे बजट च गरीबें- दरमयानें तबके ते नौजवानें सनें सब्भनें नागरिकें पर ध्यान केन्द्रत कीता गेदा ऐ।

<><><><><><>

## US Iran Military

अमरीका दे राष्ट्रपति डोनाल्ड ट्रम्प होरें दुनिया दे सब्भनें शा बडे ज्हाज ढोने दी छमता आहले समुन्द्री बेडे U.S.S. गेराल्ड आर फोर्ड गी कैरेबियन सागर थमां मध्यपूर्व च तैनात करने दी तस्दीक कीती ऐ। एहदा उद्देश्य इलाके च अमरीकी जंगी बेडें ते फौजी साज-सम्यान दी छमताएं गी बधाना ऐ। उंनें आखेया जे इरान च सत्ता परिवर्तन अमरिका लेई सब्भनें शा खरी गल्ल होग- कीजे प्रशासन फौजी कारवाई करने पर विचार करा'करदा ऐ। ट्रम्प होरें उत्तरी कैरोलीना दे फोर्ट ब्रैग च अपनी सैनिकें कन्नै मलाटी दे बाद एह गल्ल आक्खी। इसै दौरान खाड़ी अरब मुल्लें चेतावनी दिती ऐ जे जेकर कोई बी हमला मध्यपूर्व च इक होर क्षेत्रीय तनाजे गी जन्म देई सकदा ऐ- जेहडा अजें बी गाजा पट्टी च इस्राइल हमास संघर्ष दी मार झल्लै करदा ऐ। तोंआई इरान च पिच्छले महीने होए दे देश व्यापी विरोध-प्रदर्शनें दे दौरान होई दी कारवाई दौरान मारे गेदे ज्हारां बदे लोकें लेई 40 दिनें दा सोग मनाया जा'रदा ऐ।

<><><><><><>

## World Leaders -India AI Summit

अतरु 16 फरवरी गी नमीं दिल्ली च शुरु होआ'रदे भारत- AI इम्पैक्ट शिखर सम्मेलन च 20 कोला मते मुल्लें दे नेता शामिल होने जा'रदे ना। 5 दिन दे इस सम्मेलन च शामिल होने जा'रदे प्रमुख नेताएं च फ्रांस दे राष्ट्रपति इमैनुअल मैक्रों- ब्राजील दे राष्ट्रपति लूला डी सिल्वा- स्पेन दे राष्ट्रपति पेड्रो सांचेज़- स्विटजरलैंड दे राष्ट्रपति गे परमेलिन- नीदरलैंडस दे प्रधानमंत्री डिक स्कूफ- मारीशस दे

प्रधानमंत्री डा. नवीन चन्द्र रामगुलाम- श्रीलंका दे राष्ट्रपति अनुरा कुमारा दिसा नायके सेशल्स दे उपराष्ट्रपति सेबा स्टियन पिल्ले ते भूटान दे प्रधानमंत्री शेरीन तोगबे शामिल ना। विदेशमंत्रालय नै इक ब्यान च आखेया जे सम्मेलन च बोलिविया- क्रोएशिया-फिनलैंड- ग्रीस- ग्याना- कजाकिस्तान- लिस टैनस्टेन सर्बिया ते स्लोवाकिया दे प्रतिनिधि बी शामिल होगन। एहदे इलावा एहदे च 45 कोला मते मुखें दे प्रतिनिधि बी शामिल होगन। सम्मेलन दी चर्चा च संयुक्त राष्ट्र महासचिव ते केई अंतराष्ट्रीय संगठन दे अधिकारी बी हिस्सा लैगन। संयुक्त अरब अमीरात दे शिष्टमंडल दी अगुआई अबुधाबी दे शहजादे खालिद बिन मोहम्मद बिन जायद अल निहान होर करंगन। इस सम्मेलन दा मकसद भलेया अज्जै-कल्लै दिये आधुनिक तकनीके च अंतराष्ट्रीय सहयोग बी बधाना ते कूटनीति भ्याली गी मजबूती देना ऐ।

<><><><><><>

## Vishnav -P. Coference

केंद्री रेल मंत्री अश्विनी वैष्णव हो'रें अज्ज आखेया ऐ जे रेलवे औंदे 3 बरें च 124 मल्टीमॉडल कार्गो टनिर्मनल तयार करोग। अज्ज नमीं दिल्ली रेलवे रिफार्म 2026 विषय पर इक संवाददाता सम्मेलन गी सम्बोधित करदे होई वैष्णव हो'रें आखेया जे रेलवे-यात्रिये लेई साफ ते स्वच्छ यात्रा यकीनी बनने लेई पक्की बवस्था करा'करदा ऐ। उ'नें आखेया जे रेलवे लेई पर्यावरण दे संरक्षण दा पूरा ख्याल रखदे होई यात्रिये गी साफ-सुथरी रेल सेवा उपलब्ध कराना पैहली तरजीह ऐ।

<><><><><><>

<><><><><><>

## C-Dot Agreement

टैलीमैक्टिक्स विकास केन्द्र सी-डॉट नै क्वांटम सुरक्षा क्षेत्र च सहयोग लेई सिनर्जी क्वांटम इंडिया प्राइवेट लिमिटेड कन्नै इक इक समझौता पत्र पर दस्तखत कीते ना। संचार मंत्रालय नै जानकारी दिती

ऐ जे इस समझौते दा मकसद उभरदे क्वांटम कंप्यूटिंग खतरें खलाफ देश दी साइबर सुरक्षा गी निगगर करना ऐ। कन्नै गै उपकरणें च क्वांटम संवेदनशील क्रिप्टो ग्राफिक एल्गोरिदम दा पता लाने लेई सांझे तौरा पर इक आटोमैटिक उपकरण विकसित करना ऐ। सी. डॉट नै दस्सेया जे एह उपकरणें गी आटोमैटिक रूप कन्नै स्कैन करियै इस्तमाल च औने आहले क्रिप्टो ग्राफिक एल्गोरीदम ते सुरक्षा तंत्रें दी पंछान करोग। एह सुरक्षा कमजोरियें दा पता लाग ते क्वांटम सुरक्षित ते क्वांटम संवेदनशील एल्गोरीदम बश्कार स्पष्ट रूप कन्नै फर्क करोग। एह प्रणाली संवेदनशील एल्गोरीदम- उन्दे उद्देश्य ते उपकरणें दे अंदर उन्दी स्टीक स्थिति गी उजागर करने आहली तफसीली रिपोर्ट बी तयार करोग- जेहदे नै क्वांटम दे बाद आहली सुरक्षा बक्ख अगड़े बधने च मदद थ्होग। इस प्रक्रिया च त्रै प्रमुख माडयूल शामिल होगंन। बाहरी ब्लैक बाक्स स्कैनिंग ते क्वांटम खतरे दे मूलाकनें लेई इक वैब एप्लीकेशन तयार कीती जाहग।

<><><><><><>

## B-Desh -BNP

बांगलादेश नैशनलिस्ट पार्टी (BNP) 13में जातिया संगसद चुनाएं च दो तिहाई बहुमत हासल करने मगरा अगली सरकार बनाने दी तयारी करा रदी ऐ। चुनां आयोग आसेया 2 सौ 97 सीटें लेई जारी कीते गेदे सरकारी नतीजें मुजब BNP नै 209 सीटां जितियां न। 300 सदस्यें च सरकार बनाने आस्तै 151 सीटें दी जरूरत होंदी ऐ। अधिकारियें दस्सेया ऐ जे नमें चुने गेदे संसद सदस्यें गी 16 फरवरी गी शपथ लैने दी मेद ऐ। प्रधानमंत्री नरेन्द्र मोदी होरें BNP दे चेयरमैन तारिक रहमान हुंदे कन्नै गल्लबात करियै उनेंगी इस जित्त आस्तै बधाई दिती ऐ। सोशल मीडिया पोस्ट च प्रधानमंत्री होरें दौनें राष्ट्रें दे लोकें गी शांति-तरक्की ते समृद्धि लेई भारत दी लगातार प्रतिबद्धता फही पक्की कीती ऐ।

<><><><><><>



हे। आई.सी.सी. टी-20 विश्व कप च कल दा दिन बड़ा खास होने आहला ऐ किजे कल भारत ते पाकिस्तान बश्कार मैच खेडेया जाना ऐ। एह मैच कल शामी 7 बजे कोलम्बो च खेडेया जाग। एहदे इलावा कल दंऊ होर मैच बी होगं। पैहला बडुलै 11 बजे नेपाल ते वेस्ट इंडीज बश्कार- दूआ दिनें 3 बजे अमरीका ते नामीबिया बश्कार ते त्रीया जियां असें पैहले बी दस्सेया शामी 7 बजे भारत ते पाकिस्तान इक-दूए दे रिवायती हरीफ आमने-सामने होगं।

<><><><><><>

## Weather IMD

भारतीय मौसम विभाग नै हिमाचल प्रदेश च कल्लै तगर घनी धुंध आहली स्थिति बने दे रौहने दी पेशनगोई कीती ऐ। मौसम एजेसी नै अरुणाचल प्रदेश च बी कल्लै तगर गरज-चमक कन्नै बरखा पौने दी संभावना जताई ऐ। जम्मू-कश्मीर- लद्दाख- हिमाचल प्रदेश दे उत्तराखंड च अगले दो थमां त्रै दिन तगर इयै नेही स्थिति बनी दी रौहग। मौसम विभाग ने अगगे दस्सेया ऐ जे उत्तर पच्छिम ते मध्य भारत च कल तगर घट्टोघट्ट तापमान च कोई मता बदलाव औने दी मेद नेई ऐ। मौसम विभाग नै अगले दो-त्रंऊ दिनें लेई तटीय कर्नाटक ते कोंकण ते गोवा च गर्म ते नमीं आहले मौसम दा बी अंदाजा लाया ऐ।

<><><><><><>